

- मुख्यमंत्री भजनलाल शर्मा उद्योग जगत अर कर सलाहकार संघां रा प्रतिनिधियां रे सागे प्री-बजट बैठक करी।
- केन्द्रीय नवीन अर नवीकरणीय ऊर्जा मंत्री प्रल्हाद जोशी काल जयपुर मांय क्षेत्रीय समीक्षा बैठक करेला।
- मेजर मिनरल ब्लॉक री नीलामी मांय राजस्थान देश मांय अव्वल-केन्द्रीय खान मंत्री राष्ट्रीय पुरस्कार दीना।
- उपमुख्यमंत्री अर परिवहन मंत्री प्रेमचंद बैरवा कयो -सड़क सुरक्षा सगळा री सामूहिक जिम्मेदारी।
- कोलकाता रा आरजीकर मेडिकल कॉलेज री डॉक्टर सू दुराचार अर हत्या रा मामला रा मुख्य आरोपी संजय रॉय ने उम्रकैद री सजा।

000

माळी बरस 2025-26 रा बजट खातर राज्य सरकार प्री-बजट बैठकां कर री है। इण ई कड़ी मांय मुख्यमंत्री भजनलाल शर्मा आज उद्योग अर व्यापार जगत अर कर सलाहकार संघां रा प्रतिनिधियां रे सागे संवाद करयो। मुख्यमंत्री कार्यालय मांय श्री शर्मा प्रतिभागियां रा सुझाव सुण्या अर वां सू न्यारा-न्यारा हलकां मांय रोजगार पैदा करबा समेत दूजा मुद्दा माथे चर्चा करी। वठी ने पैली आळा उपमुख्यमंत्री सचिन पायलट आस जताई के केन्द्र सरकार रा आवण वाळा बजट सू मध्यम तबका ने राहत मिलेला। श्री पायलट आज पाली जिला रा सांडेराव मारग माथे खबरनवीसा सू बातचीत कर रह्या हा। वे कया के सरकार लोगां माथे किंण ई नया टैक्स रो बोझ नी डालेला।

000

लोकसभा अध्यक्ष ओम बिरला कया के पीठासीन अधिकारी सम्मेलन सू देश री लोकतांत्रिक संस्थावां मजबूत बणेला। श्री बिरला आज पटना मांय अखिल भारतीय पीठासीन अधिकारी सम्मेलन रो उद्घाटन कर्या। एआईपीओसी रा 85वां सत्र ने संबोधित करता थकां वे विधायी निकायां री मान-मर्यादा बणाया राखबा री बात कही। वे प्रतिभागियां सू संवैधानिक मूल्यां रे मुजब लोगां री उम्मीदां माथे खरो उतरबा ने कया।

दो दिन रा ई सम्मेलन मांय देशभर री न्यारी-न्यारी विधायी निकायां, लोकसभा अर राज्यसभा पीठासीन अहलकार शिरकत कर रह्या है। सम्मेलन मांय भाग लेबा गया विधानसभा अध्यक्ष वासुदेव देवनानी री तबियत बिगड़बा रे पाछे वां ने पटना रा आई.जी.आई.एम.एस. सफाखाना ले जायो गयो। मुख्यमंत्री भजनलाल शर्मा हालात री जाणकारी लेता ही जयपुर रा एसएमएस सफाखाना रा हृदय रोग जाणकारां री टीम ने पटना खातर रवाना करया। मुख्यमंत्री श्री देवनानी रे बेगी ठीक होबा री कामना करी।

000

केन्द्रीय नवीन अर नवीकरणीय ऊर्जा मंत्री प्रल्हाद जोशी रो कल जयपुर दौरा रो कार्यक्रम है। श्री जोशी नवीन अर नवीकरणीय ऊर्जा मंत्रालय री क्षेत्रीय समीक्षा बैठक करेला। बैठक मांय मुख्यमंत्री भजनलाल शर्मा भी भाग लेवेला। इण रे अलावा केई राज्यां रा नवीन अर नवीकरणीय ऊर्जा मंत्री अर आला अधिकारी भी बैठक मांय मौजूद रहवेला। बतायो जावे है के हाल ही मांय जयपुर मांय व्हीया राइजिंग राजस्थान ग्लोबल इन्वेस्टमेंट समिट मांय सब ऊं बत्ता एमओयू ऊर्जा रा हलका मांय व्हा है।

000

केन्द्रीय श्रम अर रोजगार मंत्री डॉ. मनसुख मांडविया कया के भारत बहुराष्ट्रीय निगमां सू प्रत्यक्ष विदेशी निवेश कर ईज ऑफ बिजनेस मांय सुधार करयो है। डॉ. मांडविया नई दिल्ली मांय

अनौपचारिक खेतर मांय कामगारां खातर सामाजिक सुरक्षा कवरेज माथे दो दिन री अंतर्राष्ट्रीय संगोष्ठी रो उद्घाटन करबा रे पछे या बात कही। वे कया के कामगारां री सामाजिक सुरक्षा सरकार री प्राथमिकता है।

000

राज्यपाल हरिभाऊ बागडे कया के पशुपालकां री माळी बढोतरी खातर हर भांत री कोशिश करी जाणी चाहिजे। वे कया के सगळा ने मिल-जुलर काम करबा री दरकार है। श्री बागडे आज महाराष्ट्र रा कोपरगांव तालुका मांय गोदावरी दूध इकाई अर शुद्धिकरण मशीन अर कर्मचारी निवास रा नुवा भवन री शिलान्यास जळसा मांय बोल रिया हा। राज्यपाल कया के पशुपालकां रा विकास खातर दूध भेळो करबा, बांटबा अर दूध सूं बण्या न्यारा-न्यारा उत्पादां री पैकेजिंग असरदार तरीका ऊं पक्की करी जाणी चाहिजे।

000

देशभर मांय मेजर मिनरल ब्लॉक री नीलामी मांय राजस्थान पैली ठोड़ माथे रियो। केन्द्रीय खान मंत्री जी. किशन रेड्डी आज कोणार्क मांय राजस्थान ने यो सम्मान दियो। देशभर रा खान मंत्रियां री कॉन्फ्रेन्स मांय खान महकमा रा प्रमुख शासन सचिव टी. रविकान्त ओ पुरस्कार लीना। श्री रविकान्त बताया के देशभर मांय सब ऊं बत्ता 31 मेजर मिनरल ब्लॉक री नीलामी राजस्थान मांय करी गई है। वे कया के इण मांय 22 माइनिंग लीज अर 9 कंपोजिट लाइसेंस खातर नीलामी करी गई ही। इण रे साथे ही खान महकमा रा निदेशक भगवती प्रसाद कलाल बताया के राज्य मांय खनिज हलका मांय कर्या गया नवाचार, अवैध खनन माथे असरदार रोक खातर चलाया गया अभियान सूं राजस्थान री राष्ट्रीय स्तर माथे पिछाण बणी है।

000

राष्ट्रीय सड़क सुरक्षा माह रे तैत प्रदेशभर मांय जागरुकता गतिविधियां जारी है। इण रे जरिये आम लोगां मांय यातायात अर सड़क सुरक्षा रा नियमां री पालना करबा खातर जाग जगाई जावेला। इण रे साथे ही सड़क हादसां मांय कमी लाबा री कोशिश करी जावेला। आज अजमेर मांय यातायात पुलिस री कानी ऊं स्कूली टाबरां रे सागे रैली काढी गई। वठी ने पाली रा सोजत मांय गाडियां माथे रिप्लेक्टर स्टीकर्स लगाया गया। वठी ने सवाईमाधोपुर मांय नेहरू युवा केन्द्र अर एनएसएस रा स्वयं सेवक भी यातायात पुलिस रे सागे मिलर सड़क सुरक्षा रो संदेश दे रिया है। ये वॉलियंटर्स आज शहर रा खास-खास चौराहां माथे आम लोगां ने यातायात रा नियमां री जाणकारी दी। इण ई भांत झुंझुनूं मांय स्वयं सेवकां री टीम ड्राईवरां री समझाइश करी। इण रे सागे ही जनजागरुकता खातर विचार गोष्ठियां भी राखी जारी है। उपमुख्यमंत्री डॉ. प्रेमचंद बैरवा भी आज झुंझुनूं दौरा माथे रिया। खबरनवीसां सूं बातचीत मांय वे कया के सड़क सुरक्षा किणी भी एक महकमा री बजाय सागळा री सामुहिक जिम्मेदारी है।

000

संसदीय कार्यमंत्री जोगाराम पटेल आज जोधपुर रा लूणी हलका रा केरू गांव मांय सामुदायिक स्वास्थ्य केन्द्र रो औचक जायजो कर्यो। इण दौरान वे स्वास्थ्य केन्द्र मांय मुहैया सुविधावां री जाणकारी ली। वठी ने राष्ट्रीय बाल स्वास्थ्य कार्यक्रम रे तैत भरतपुर रा नदबई मांय चिकित्सा शिविर लगायो गयो। इण मांय टाबरां री स्वास्थ्य जांच करी गई। गंभीर बीमारी रा 38 टाबरां ने जांच खातर आरबीएम सफाखाना भिजवायो गयो।

000

कोलकाता रो आरजीकर मेडिकल कॉलेज री डॉक्टर सूं दुराचार अर हत्या रा मामला रा मुख्य आरोपी संजय रॉय ने उम्रकैद री सजा सुणाई गई है। सियालदह री सत्र अदालत ओ फैसलो सुणाता थकां राज्य सरकार ने पीडित परिवार ने 17 लाख रुपया रो मुआवजो देबा ने कयो। अदालत लारला शनिवार ने संजय रॉय ने इण मामला मांय दोषी ठहरायो हो। महिला प्रशिक्षु डॉक्टर रो शव लारला बरस 9 अगस्त ने आरजीकर मेडिकल कॉलेज रा एक सेमिनार हॉल सूं बरामद करी गई ही। सीबीआई इण मामला मांय रॉय रे खिलाफ आरोप पत्र दाखिल कर्यो है।

000

झालावाड़ जिला मांय बचपन बचाओ अभियान रे तैत नशे अर मोबाइल री लत छुड़ाबा री मुहीम चलायी गई। जिला कलेक्टर अजय सिंह राठौड़ बताया के इण रे तैत करीब ढाई हजार सूं बत्ती संस्थानां रा दो लाख सूं बत्ता टाबरां ने नशा सूं दूर रेहबा री सौगंध दिराई गई।

000

रक्षा मंत्री राजनाथ सिंह कया के युवा देश री संपत्ति है, जो राष्ट्र निर्माण मांय योगदान देवे है। आज दिल्ली मांय राष्ट्रीय कैडेट कोर-एनसीसी रा गणतंत्र दिवस शिविर ने संबोधित करता थकां श्री सिंह कया के भारत री संस्कृति 140 करोड़ लोगां री एकता सू बंधी व्ही है।

000

प्रदेश मांय बत्ती ठोडां माथे तापमान मांय बढ़ोतरी सू लोगां ने कड़ाका री ठण्ड सू राहत मिळी है। बत्ता शहरां मांय कम-ऊ-कम तापमान 9 डिग्री सेल्सियस सू 14 डिग्री सेल्सियस रे बीच दरज करयो गयो।

000

काल सू प्रदेश मांय नया पश्चिमी विक्षोभ रे सक्रिय होबा रा आसार है। इण रे चालता कुछेक ठोडां माथे हल्को मेह बरस सके है।

000